



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՈՍՏԻԿԱՆՈՒԹՅԱՆ ՊԵՏԻ
ՆՐԱՄԱՆ

Թիվ 3-L

ՀԱՍԱՐԱԿԱԿԱՆ ԿԱՐԳԻ ՊԱՀՊԱՆՄԱՆ ԵՎ
ՀԱՍԱՐԱԿԱԿԱՆ ԱՆՎՏԱՆԳՈՒԹՅԱՆ
ԱՊԱՀՈՎՄԱՆ ԱՇԽԱՏԱՆՔՆԵՐՈՒՄ ՀՀ
ՈՍՏԻԿԱՆՈՒԹՅԱՆ ՈՒՍՈՒՄՆԱԿԱՆ
ՀԱՍՏԱՏՈՒԹՅԱՆ ՍՈՎՈՐՈՂՆԵՐԻ,
ՎԵՐԱՊԱՏՐԱՍՏՈՒՄ ԱՆՑՆՈՂ ԱՆՁԱՆՑ
ՆԵՐԳՐԱՎՄԱՆ ԿԱՐԳԸ ՍԱՀՄԱՆԵԼՈՒ ՄԱՍԻՆ

Հիմք ընդունելով «Ոստիկանության մասին» Հայաստանի Հանրապետության օրենքի 6-րդ հոդվածի 1-ին մասը և ղեկավարվելով ՀՀ վարչապետի 2018 թվականի հունիսի 11-ի «Հայաստանի Հանրապետության ոստիկանության կանոնադրությունը հաստատելու մասին» թիվ N 751-L որոշմամբ հաստատված հավելվածի 20-րդ կետի 8-րդ ենթակետով՝

Հ Ր Ա Մ Ա Յ ՈՒ Մ Ե Մ՝

1. Հաստատել հասարակական կարգի պահպանման և հասարակական անվտանգության ապահովման աշխատանքներում ՀՀ ոստիկանության ուսումնական հաստատության սովորողների, վերապատրաստում անցնող անձանց ներգրավման կարգ՝ համաձայն հավելվածի:
2. Հրամանը հայտարարել ՀՀ ոստիկանության բարձրագույն, գլխավոր, ավագ, միջին և կրտսեր խմբի պաշտոններ զբաղեցնող ծառայողներին:

ԳՆԴԱՊԵՏ

Վ. ՂԱԶԱՐՅԱՆ

«01» 02 2021թ.

ք. Երևան

Հավելված
ՀՀ ոստիկանության պետի
« 01 » 02 2021թ.
թիվ 3 -Լ հրամանի

ԿԱՐԳ

ՀԱՍԱՐԱԿԱԿԱՆ ԿԱՐԳԻ ՊԱՀՊԱՆՄԱՆ ԵՎ ՀԱՍԱՐԱԿԱԿԱՆ ԱՆՎՏԱՆԳՈՒԹՅԱՆ ԱՊԱՀՈՎՄԱՆ ԱՇԽԱՏԱՆՔՆԵՐՈՒՄ ՀՀ ՈՍՏԻԿԱՆՈՒԹՅԱՆ ՈՒՍՈՒՄՆԱԿԱՆ ՀԱՍՏԱՏՈՒԹՅԱՆ ՍՈՎՈՐՈՂՆԵՐԻ, ՎԵՐԱՊԱՏՐԱՍՏՈՒՄ ԱՆՑՆՈՂ ԱՆՁԱՆՑ ՆԵՐԳՐԱՎՄԱՆ

1. Սույն իրավական ակտով սահմանվում է Հայաստանի Հանրապետության ոստիկանության ուսումնական հաստատության (այսուհետ՝ ուսումնական հաստատություն) սովորողների, վերապատրաստում անցնող անձանց հասարակական կարգի պահպանման և հասարակական անվտանգության ապահովման աշխատանքներում ներգրավվելու կարգը:
2. Սույն իրավական ակտի դրույթները տարածվում են ուսումնական հաստատության պետական պատվերի շրջանակներում ուսուցման սովորողների, հեռակա ուսուցման ոստիկանության ծառայողների, ինչպես նաև լրացուցիչ կրթական ծրագրով վերապատրաստում անցնող անձանց վրա:
3. Ուսումնական հաստատության պետական պատվերի շրջանակներում ուսուցման սովորողները (այսուհետ՝ սովորող) և (կամ) հեռակա ուսուցման ոստիկանության ծառայողները, լրացուցիչ կրթական ծրագրով վերապատրաստում անցնող անձինք հասարակական կարգի պահպանման և հասարակական անվտանգության ապահովման աշխատանքներում ներգրավվում են տվյալ բնագավառը համակարգող՝ ՀՀ ոստիկանության պետի տեղակալի գրավոր հանձնարարականի հիման վրա:
4. Բնագավառը համակարգող՝ ՀՀ ոստիկանության պետի տեղակալի գրավոր հանձնարարականն ստանալուց հետո ուսումնական հաստատությունը ՀՀ ոստիկանության հասարակական անվտանգության ապահովման գլխավոր վարչություն է ներկայացնում սովորողների ցուցակը, ովքեր ենթակա են ներգրավման հասարակական կարգի պահպանման և հասարակական անվտանգության ապահովման աշխատանքներում:
5. ՀՀ ոստիկանության հասարակական անվտանգության ապահովման գլխավոր վարչությունն ուսումնական հաստատությանը գրավոր իրազեկում է ՀՀ ոստիկանության կառուցվածքային այն ստորաբաժանման (ստորաբաժանումների) և ժամկետի վերաբերյալ, որոնց կազմում սովորողներն ընդգրկվելու են հասարակական կարգի պահպանման և հասարակական անվտանգության ապահովման աշխատանքներում:
6. Ուսումնական հաստատությունը գրավոր իրազեկվելուց հետո պարտավոր է ապահովելու սովորողների սահմանված ժամկետներում և պատշաճ ներկայությունը տվյալ ստորաբաժանում:
7. ՀՀ ոստիկանության կառուցվածքային ստորաբաժանումը, որի կազմում ընդգրկվել են սովորողները, պարտավոր է ստուգել նրանց ներկայությունը, իրականացնել հրահանգավորում, պատշաճ հսկողություն, ահրաժեշտության դեպքում կազմել ծառայության ժամանակացույց, իսկ հասարակական կարգի պահպանման և հասարակական անվտանգության ապահովման աշխատանքներում սովորողների

ինքնուրույն մասնակցության դեպքում՝ ոստիկանության փորձառու ծառայողներից նշանակել ղեկավար:

8. ՀՀ ոստիկանության կառուցվածքային ստորաբաժանումը հասարակական կարգի պահպանման և հասարակական անվտանգության ապահովման աշխատանքներում սովորողների ներգրավման ավարտի մասին իրազեկում է ուսումնական հաստատությանը:

9. Այն դեպքում, երբ տվյալ բնագավառը համակարգող ՀՀ ոստիկանության պետի տեղակալի գրավոր հանձնարարականը ներառում է հեռակա ուսուցման ոստիկանության ծառայողներին և (կամ) լրացուցիչ կրթական ծրագրով վերապատրաստում անցնող անձանց հասարակական կարգի պահպանման և հասարակական անվտանգության ապահովման աշխատանքներում ներգրավման մասին նշում, ապա ուսումնական հաստատությունը դադարեցնում է վերոնշյալ ոստիկանության ծառայողների ուսումնական պարապմունքները, իսկ այդ անձինք վերադառնում են մշտական ծառայության վայրի՝ ՀՀ ոստիկանության կառուցվածքային ստորաբաժանում:

10. Հասարակական կարգի պահպանման և հասարակական անվտանգության ապահովման աշխատանքներում հեռակա ուսուցման ոստիկանության ծառայողներին և (կամ) լրացուցիչ կրթական ծրագրով վերապատրաստում անցնող անձանց ներգրավման ավարտի մասին ՀՀ ոստիկանության հասարակական անվտանգության ապահովման գլխավոր վարչությունը գրավոր իրազեկում է ուսումնական հաստատությանը, որից հետո վերսկսում է դադարեցված ուսումնական պարապմունքները: